

Las relaziuns dal Grischun cun il Tirol

■ Questa preschentaziun dat l'emprim in sguard al Tirol istoric. Quel cumpigliava er il Tirol dal Sid ch'appartegna dapi il 1918 a l'Italia. Silsuenter vegnan preschentads ils abitadis e las valladas dal pajais federativ austriac Tirol odiern che cunfineschan cun il Grischun. Ulteriurs artitgels s'occupan cun Puntina ed Alla che sa chattan pli en l'ost, ma ch'han gi inamuntada culturala ed economica speziala per il Grischun.

Tirol

Il Tirol furma la regiun al sidost da las Alps che cunfinescha a l'ost da la Svizra cun l'Engiadina Bassa e cun la Val Müstair. Il territori al nord dal Brenner furma il pajais federativ austriac dal Tirol, quel al sid dal Brenner e dal Pass da Raisch la regiun autonoma taliana Trentino-Alto Adige (Tirol dal Sid). En il temp medieval era il Tirol collià fermamain cun l'intschess cultural curretic. Nums rumantschs da lieus e da cultiras èn anc oz currents en il Vnuost, en las Dolomitas ed en la Val da l'En Superiura (Landeck, Puntina). En las vals dolomiticas è il rumantsch (ladin) anc vivent. L'Engiadina ha adina tgirà stretgas relaziuns cun la Val da l'En Superiura (ruta ostvest) e cun l'intschess da l'Adisch fin al spazi adriatic (sur il Pass dal Fuorn).

En il temp autmedieval han ils uvestgs da Cuira possedi en il Vnuost, ultra da la pussanza diocesan-ecclesiastica, era dretgs territorials seculars. A partir dal 12avel tschientaner èn ils signurs feudals ils pli pussants dal Vnuost, ils chastellans von Matsch, entrads sco vasals e ministerials en ina relaziun d'obligaziun envers l'uestgieu da Cuira. Ils conts de Tirol han acquistà il domini en la regiun da l'Adisch inferiura (Meraun), en la Val da l'Eisack, en il Pustertal sco era en las vals da l'En. Il conflict cun l'uestgieu da Cuira, che resguardava il Tirol anc il 1283 sco feud episcopal, han ils conts de Tirol decidì successivamain en lur favur. L'uestgieu da Cuira ha fatg valair ses dretgs suverans multifars sur la gliued da la Chadé en il Vnuost Superiur fin viaden il 17avel tschientaner.

A partir dal 10avel tschientaner han ils conts de Tirol possedi era dretgs da contadi en l'Engiadina Bassa ed a partir dal 14avel tschientaner l'avugadia en las Otg Dretgiras, da las qualas ils Habsburgais èn sa patronads a partir dals onns 1460. Il 1478 ha il duca Sigmund d'Austria confermà a las dretgiras tut ils dretgs e tut las libertads ed ha garantì ad ellas l'exemziun da dazi en il Tirol. La gliued da quests territoris eran d'ina vart libers Grischuns respectivamain alliads en la Republica da las Trais Lias, da l'autra vart subdits austriacs suttaless a la giustia ed a l'administraziun civila tirolaisa. Els han cumprà ora quels dretgs austriacs pir il 1649–52.

En il temp da fluriziun da l'industria da minieras en il Grischun (15avel/16avel tschientaner) han spezialists tirolais, lumbards e venezians explotà las mi-



Ischgl en il Paznaun.

FOTO: PD

nieras da fier tenor las pli modernas tecnicas da quel temp e millis Tirolais han lavurà sco miniers en il Grischun. Per incumbensa dal Tirol ha Christian Gadmer da Tavau, il pli enconuscent derschader da minieras e da cas criminals en servetsch da l'Austria, scrit in rapport davart tut las chavas da minieras e minieras da la Lia da las Diesch Dretgiras e dals signuradis da Razén e Munt S. Gieri. En las relaziuns tranter la Svizra ed il Tirol, tgiradas en ils temps da la reformaziun e da la Revolva dals purs tirolais, cumpara la figura interessanta da Michael Gaismair. Quest manader revoluziunar dals purs tirolais, politicher, diplomat e filosof è fugì il 1526 en il Grischun (a Fadrein Bogn) ed a Turig, nua ch'el ha fatg l'enconuschientscha dad Huldrych Zwingli. Qua ha el concepì il nov urden statal, la «Landesordnung» dal Tirol che cuntogna il concept per ina republica purila cristiana e democratica che n'ha dentant mai surpassà la fasa da projectaziun.

En il 17avel tschientaner ha fluri il commerzi tranter il Tirol ed il Grischun: products da latg da Tavau e da l'Engiadina d'Ota sco era laina dals guauds da l'Engiadina Bassa vegnivan exportads en la Val da l'En tirolaisa, e dad Alla vegniva importà sal. A Puntina han exiliads u deportads dal Grischun chattà pliras giadas dimora, per exempel enturn il 1620 ed il 1799. Qua han studegià dapi la fundaziun da l'università 1671 Grischuns, prevalentamain da confessiun catolica, sco era numerus auters Svizzers, tranter ils quals ca. 300 da Son Gagl. En la guerra tranter la Frantscha e l'Austria dal 1809 ha la Svizra occupà sin cumond da Napoleon il cunfin cun il Tirol. La defensiun dal sectur da cunfin Engiadina-

Puschlav è sa demussada sco difficila, cunquai che bleras vischnancas grischunas simpatisavan cun ils revoltads ed als sustegnevan. Il Grischun ha schlià il problem a moda flexibla, senza serrar il cunfin per fugitivs e conscrits. Blers Tirolais lavuran oz sco forzas stagionalas en l'economia forestala ed alpestra sco era en la branscha turistica dal Grischun. (red.)

Paznaun

Vallada alpina en il Tirol, rumantsch *Pazzanun* (istoric). Il Paznaun s'extenda parallel a l'Engiadina Bassa da la Bielerhöhe (2021 m) vers il nordost e sbucca al vest da Landeck en il Stanzertal. En il temp autmedieval han cultivà e populà Rumantschs da l'Engiadina il Paznaun e sias vals lateralas dal sid. En il 11avel tschientaner possedeavan ils signurs de Tarasp alps en la Val Fenga. En il 12avel tschientaner ha gliued dals signurs de Tarasp e da la claustra da Mariamunt colonisà la part centrala da la val principala enturn Ischgl e Maton. Per il 13avel tschientaner èn attestads bains purils en la Val Fenga. Purs libers d'Ardez e da Sent èn sa domiciliads a Cuttūra, Paznaun e Sinsen. Il 1320 è ina gruppa da Gualsers, tributaris dal suveran dal Tirol, sa chasada a Cuttūra. La vischnanca, ch'ha pers 50 % da sia populaziun tras la pestilenza en ils onns 1348–51, appartegneva en il temp medieval ecclesiasticamain ad Ardez ed a l'uestgieu da Cuira. Essend la via ad Ardez lunga e privlusa per turnar a laschar battegiar ils uffants e sepulir ils morts, han ils abitants dal Paznaun erigi il 1359 ina baselgia parochiala, consecrada il 1383 da l'uestg Johannes II Ministri. Da quel temp furmavan ils purs e colonists rumantschs anc la maiorità da la populaziun da Cuttūra; pir en il 15avel tschientaner èn els vegnids minorisads en consequenza da la segunda unda d'immigraziun da Gualsers, oravant tut en la part sut da la Val Jam che sbucca a Cuttūra. Enturn il 1365 han cedi ils parochians da Sent la Val Visnitz (vallada al sid da Kappel) a Tirolais da lingua tudestga ch'han minorisà successivamain la populaziun rumantscha durant il 16avel tschientaner. Durant plirs tschientaners han purs da l'Engiadina alpeglià lur muaglia en il Paznaun: quels da Ramosch e Sent sin las alps da la Val Fenga, quels d'Ardez, Guarda e Ftan sin quellas da la regiun dal Vermunt da l'autra vart dal Pass Futschöl (2768 m) e da la Fuorcla Vermunt (2798 m). (Martin Bundi)

Val Jam

Val laterala dal Paznaun che s'extenda da Cuttūra (1583 m) al Pass Futschöl (2768 m) e da là vinavant tras la Val Tasna ad Ardez. Sur il Pass Futschöl e la Val Jam

chatschavan ils Engiadinais dapi il 11avel tschientaner lur muvel sin las alps dal Paznaun (Vallùlla e Zeinisjoch). Cun la colonisaziun da Cuttūra tras ils Engiadinais dapi il temp medieval tardiv, surtut a partir da la vischnanca d'Ardez, a la quala Cuttūra appartegneva ecclesiasticamain, han ins intensivà l'exploraziun da la Val Jam. Era ils Gualsers, domiciliads a Cuttūra dapi il 1320, èn sa participads a la giuida da quella val. Tenor il rodel da Matsch (ca. 1370) pajavan ils Gualsers als da Tarasp in tschains da tschingt gliavras en munaida per l'Alp Amyam. Ils Valladers han utilisà la Val Jam fin viaden il 19avel tschientaner per l'alpegiaziun a Vermunt. (Martin Bundi)

Nauders (Danuder)

Vischnanca austriaca al nord dal Pass da Raich, district da Landeck, tudestg Nauders (uffizial). Il vitg, construi ca. 50 s.C. a la Via Claudia Augusta, sa numnava en il temp roman *Inutrium*. A partir dal 10avel tschientaner era Danuder la sedia da la dretgira da Munt Danuder en il contadi dal Vnuost che cumpigliava era l'Engiadina Bassa. Il pli tard enturn il 1300 han ils Tirolais erigi ina duana al passadi sur l'En a Finstermünz. Ils signurs von Tarasp possedeavan bains a Danuder. Durant il temp medieval tardiv e fin il mument che l'Engiadina è sa liberada da l'Austria (1652) ha exequì il chastellan, resident sin il chastè da Munt Danuder, la giurisdicziun criminala austriaca en l'Engiadina Bassa. L'onn 1475 han ils Engiadinais refusà da pajar a quel l'uschenumnà tschains da giaglinas. En la Guerra da las giaglinas (1475) ed en la Guerra svabaisa (1499) han ils Engiadinais destrui il chastè. Conflicts èn medemamain naschids en connex cun ils bains grischuns en la regiun da Cuttūra. Il 1609 ha destrui ina lavina 22 chasas ed il 1880 in incendi 155. La nova via imperiala da Danuder a Fuond è vegnida construida il 1850–54. Fin il 1912 circulava il traffic da l'Engiadina vers Landeck sur Danuder ch'ha mantegnì sias stretgas relaziuns cun l'Engiadina Bassa fin il di dad oz. (Paul Eugen Grimm)

Finstermünz

Passadi fortifitgà a l'En en la vischnanca da Danuder. 1241 *Finsterminze*, 1306 *Vistemeza*. La Via Claudia Augusta, terminada l'onn 46 s.C., manava sur il Pass da Raich e traversava l'En a Finstermünz nua ch'igl ha existì dal temp roman fin il 1854 in post da duana. La fortezza da Sigmundseck a Finstermünz datescha dal 1471. La via da Hochfinstermünz (erigida il 1854) cun la fortezza omonima traversa l'En al nordost e cuntinuescha da la vart sanestra dal flum. In contract dal

1868 ha reglà il cunfin contestà sut Tschlin: la Svizra ha obtegnì la vart sanestra da l'En fin avant Alt-Finstermünz, ella ha dentant stui desister da fortificaziuns al Munt Novella. Il 1923 è vegnida construida a la riva sanestra da l'En la via d'autos che maina tras l'Engiadina fin al cunfin austriac. (Jürg Simonett)

Pfunds (Fuond)

Chau-punt d'ina via da sauma preromana en il Tirol che vegniva guntgida da la Via Claudia Augusta, tudestg Pfunds (uffizial). Sut il domini dals conts von Tirol è Fuond stà da l'entschatta dal 14avel tschientaner fin il 1760 in lieu da duana tranter Danuder e Landeck. La suletta via charrabla dal Tirol en l'Engiadina Bassa manava durant plirs tschientaners da Fuond sur Finstermünz e Danuder a Martina. Il 1886 è vegnì avert il stradun nov. (Adolf Collenberg)

Innsbruck (Puntina)

Chapitala dal pajais federativ austriac Tirol. En ils onns 1420 ha dischlocà il duca Friedrich IV von Habsburg sia residenza a Puntina. Da là davent èn era vegnids guvernads ed administrads fin il 1752 ils dominis ed ils dretgs habsburgais en il Grischun: Tarasp, Razén, Otg Dretgiras, Engiadina Bassa. Dal zercladur 1799 fin a lur trasferiment a Linz e Graz en il 1800 èn vegnids tegnids en ferma a Puntina 85 ostags, exponents da l'elita intelletuala e politica grischuna, sco aderents (effectivs u presumptivs) da la Frantscha e da la helvetica. Tranter il 1671 ed il 1900 eran inscrits a l'Università da Puntina var 120 students grischuns. A la professura da romanistica a Puntina, fundada da Theodor Gartner il 1899, han ils Rumantschs d'engraziar perscrutaziuns impurtantas. Dapi il 1965 exista in lectorat rumantsch e dapi il 1972 ina partiziun da retoromanistica (cun l'organ «Romanica Ænipontana») a l'Institut da romanistica a Puntina. Accent principal durant ils davos 10 onns èn stadas la lexicografia ladina e la toponomastica da la Retoromania submersa. (Adolf Collenberg)

Hall (Alla)

Center dal commerzi da sal en il Tirol, impurtant da tuts temps per la provisiun da sal dal Grischun, tudestg Hall. En il 12avel tschientaner manavan ils berniers engiadinais, ultra da products indigens, era rauba da Milaun ad Alla per vender quella cunter sal e graun. Fin viaden il 19avel tschientaner èn vegnidas smersas grondas quantitads da laina en l'Engiadina Bassa per las salinas dad Alla. L'export da laina era economicamain fitg impurtant per la regiun, ha dentant periclità ils guauds engiadinais. Il 1751 han ins importà ca. 780 t sal sin la Via imperiala: in terz per l'Engiadina Bassa, in terz per l'Engiadina d'Ota, la Bergiaglia ed il Partenz ed in terz per Tavau. Els Grischuns baratavan lur products da latg cunter sal ad Alla. Il 1513 ha l'imperatur Maximilian I ordinà da cular ils minerals da la Val Scharl ad Alla. Enturn il 1770 ha Peter Conradin Constantin von Planta da Zuoz elavurà in project per stabilir in monopol da sal e per construir ina largia via da commerzi da Clavenna a Danuder (cun colliaziun ad Alla). Els Salis han dentant sabotà quest project. Suenter il 1803 ha il chantun Grischun surpiglià il monopol da sal. La chasa da commerzi Massner e Braun a Cuira era responsabla per la distribuziun. (Adolf Collenberg)

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



En la citad veglia da Puntina.

FOTO: GÜNTHER HAAS / PIXELIO